

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
KANTONALNI SUD U ZENICI  
Broj: 04 0 K 012220 23 K  
Zenica, 26.04.2024. godine

U IME FEDERACIJE BOSNE I HERCEGOVINE !

Kantonalni sud u Zenici u vijeću sastavljenom od sudija Maličbegović Enesa, kao predsjednika vijeća, te sudija Subašić Ljilje i Kokor Srećka, kao članova vijeća, uz sudjelovanje zapisničarke Telalović Jele , u krivičnom predmetu protiv optužene Husić Sabihe, zbog krivičnog djela Zloupotreba položaja ili ovlaštenja iz člana 383. stav 3. u vezi sa stavom 1. KZ BIH te optuženih Alijagić Amire, Šiljak Irme, Čajlaković-Mešanović Fatime i Brandić Have, zbog krivičnog djela Nesavjestan rad u službi iz člana 382. u vezi stava 1. KZ F BIH te u vezi sa članom 31. KZ F BIH povodom optužnice Kantonalnog tužilaštva Zenica broj T04 0 KTKV 0038529 20 od 22.12.2022. godine, potvrđene od strane sudije za prethodno saslušanje ovog suda pod brojem 04 0 K 012220 22 Kps dana 04.01.2023. godine u prisustvu Kantonalnog tužioca Imamović Ermina, optuženih i njihovih branilaca, Galijatović Maide, Bavčić Nerme i Mušija Armina, advokata iz Sarajeva, na glavnom pretresu dana 26.04.2024. godine, donio je

P R E S U D U

Na osnovu člana 298. tačka b.) ZKP FBiH, protiv optuženih:

1. **HUSIĆ SABIHE**, kći O. i majke H. rođene A., rođena 01.07.1971. godine u mjestu Donja Večeriska, opština Vitez, nastanjena u Z. ul. ..., zaposlena, direktorica Udruženja građana „Medica“ Zenica, pismena, završena VSS, po zanimanju doktorica društvenih nauka iz oblasti rodne studije, udata, majka dvoje djece, srednjeg imovinskog stanja, ..., državljanka ..., JMBG: ..., neosuđivana,
2. **ALIJAGIĆ AMIRE**, kći M. i majke Z. rođene J., rođena 01.01.1958. godine u mjestu Tetovo, grad Zenica, nastanjena u Z. ul. ..., penzionerka, pismena, završena VSS, po zanimanju diplomirani pravnik, udata, majka dvoje djece, srednjeg imovinskog stanja, ..., državljanka ..., JMBG: ..., neosuđivana,
3. **ŠILJAK IRME**, kći M. i majke H. rođene R., rođena 17.06.1986. godine u Doboju, nastanjena u Z. ul. ..., pismena, završena VSS, po zanimanju profesorica engleskog jezika i književnosti, razvedena, srednjeg imovinskog stanja, ..., državljanka ..., JMBG: ..., neosuđivana,
4. **ČAJLAKOVIĆ-MEŠANOVIĆ FATIME**, kći H. i majke E. rođene Z., rođena 12.11.1988. godine u mjestu Babići, grad Zenica, nastanjena u Z. ..., pismena, završena VSS, po zanimanju socijalni pedagog, magistar socijalne pedagogije, udata, srednjeg imovinskog stanja, ..., državljanka ..., JMBG: ..., neosuđivana,

5. **BRANDIĆ HAVE**, kći S. i majke F. rođene Č., rođena 20.06.1964. godine u mjestu Donja Ljubija, opština Prijedor, pismena, završena SSS, po zanimanju tapetar, majka jednog djeteta, srednjeg imovinskog stanja, ..., državljanka ..., JMBG: ..., neosuđivana,

## ODBIJA SE OPTUŽBA

da su:

U periodu od 2014. godine do 2020. godine u Zenici, kao odgovorne osobe, Husić Sabiha, kao direktorica Udruženja građana „Medica“ Zenica, Alijagić Amira, kao predsjednica Nadzornog odbora Udruženja građana „Medica“ Zenica, Šiljak Irma, Čajlaković-Mešanović Fatima i Brandić Hava, kao članice Nadzornog odbora Udruženja građana „Medica“ Zenica,

### I) **Husić Sabiha, sama**

U periodu od 2014. godine do 2020. godine u Zenici, u svojstvu odgovorne osobe kao izvršna direktorica Udruženja građana „Medica“ Zenica (Udruženje) na kojoj poziciji se nalazila po osnovu Ugovora o radu na neodređeno vrijeme broj 01-0516-2007 od 01.07.2007. godine, odnosno kao direktorica na kojoj poziciji se nalazila na osnovu Anexa ugovora o radu broj 01-0027/2019 od 05.01.2019. godine, iskorištavanjem svojih ovlaštenja propisanih članom 26. Statuta Udruženja „Medica“ Zenica broj 01-0259-2014 od 07.02.2014. godine, prema kojem, između ostalog, kao direktorica odlučuje o podnesenim projektnim zahtjevima na različite raspise u skladu sa izvršenom analizom predstavljenih aktivnosti unosa sredstava za fiksne troškove „Medica“ Zenica i ravnomjerno uključivanje angažovanog osoblja „Medica“ Zenica, brine o prihodima i rashodima „Medica“ Zenica, upravlja i raspolaze imovinom, zaključuje i potpisuje ugovore sa drugim institucijama i organizacijama, kao i sa radno angažovanim osobama i rukovodi radom „Medica“ Zenica, a potom prekoračivši svoja ovlaštenja propisana u Pravilniku o radu Udruženja „Medica“ Zenica broj 01-0052/2010 od 08.02.2010. godine u članu 6. i 7., te suprotno članu 9., kojim je direktorica ovlaštena da zaključuje ugovore o radu na određeno ili neodređeno vrijeme, dok je angažovanje zaposlenika za privremene i povremene poslove moguće samo za poslove koji nisu u opisu poslova iz ugovora o radu i isti se isključivo obavljaju izvan radnog vremena, a koje ovlaštenje za angažovanje po osnovu privremenih i povremenih poslova je u cijelosti ukinuto odredbama Pravilnika o radu Udruženja „Medica“ Zenica broj 01-0191 od 15.02.2017. godine, sa ciljem da sebi i drugima pribavi korist i istovremeno oštetiti Udruženje, u ime Udruženja zaključila 97 ugovora o djelu i ugovora o autorskom djelu u ukupnom neto iznosu od 458.448,26 KM i to sve na način da je sama sa sobom zaključila 45 (četrdeset pet) ugovora o djelu i 9 (devet) ugovora o autorskoj naknadi po kojim joj je isplaćen neto iznos od 321.737,94 KM, sa K. H. zaključila jedan ugovor o djelu po kojem joj je isplaćen neto iznos od 4.651,67 KM, sa Šiljak Irmom zaključila 19 (devetnaest) ugovora o djelu i 3 (tri) ugovora o autorskom djelu po kojim joj je isplaćen neto iznos od 71.134,25 KM, sa H. L. zaključila 8 (osam) ugovora o djelu po kojim joj je isplaćen neto iznos od 36.844,31 KM, sa H.-Š. A. zaključila 5 (pet) ugovora o djelu po kojim joj je isplaćen neto iznos od 17.940,78 KM i sa S. M. zaključila 7 (sedam) ugovora o djelu po kojim joj je isplaćen neto iznos od 6.139,31 KM, svjesna da su obaveze za izvršenje poslova iz tih ugovora spadale u redovnu djelatnost Udruženja, te da se u tu svrhu nisu mogli zaključivati posebni ugovori o djelu ili autorskom djelu bilo sa uposlenicima, bilo sa drugim licima i da na taj način pribavlja imovinsku korist sebi i navedenim licima, te istovremeno čini

štetu Udruženju, što je i htjela, na koji način je pribavila imovinsku korist sebi u iznosu od 321.737,94 KM, K. H. imovinsku korist u iznosu od 4.651,67 KM, Šiljak Irma imovinsku korist u iznosu od 71.134,25 KM, H. L. imovinsku korist u iznosu od 36.844,31 KM, H.-Š. A. imovinsku korist u iznosu od 17.940,78 KM i S. M. imovinsku korist u iznosu od 6.139,31 KM i istovremeno oštetila Udruženje građana „Medica“ Zenica za ukupan iznos od 458.448,26 KM,

## **II) Alijagić Amira, Šiljak Irma, Čajlaković-Mešanović Fatima i Brandić Hava, zajedno**

U periodu od 07.02.2014. godine do 2020. godine u Zenici kao odgovorne osobe i to članovi Nadzornog odbora u Udruženju građana „Medica“ Zenica koje je imenovala Skupština Udruženja građana „Medica“ Odlukom broj 01-0253-2014. od 08.02.2014. godine i to Alijagić Amira u svojstvu Predsjednika Nadzornog odbora u UG „Medica“ Zenica od 07.02.2014. godine, Šiljak Irma u svojstvu člana Nadzornog odbora u UG „Medica“ Zenica od 07.02.2014. godine, Čajlaković-Mešanović Fatima u svojstvu člana Nadzornog odbora u UG „Medica“ Zenica u periodu od 07.02.2014. godine do 26.01.2016. godine, Brandić Hava u svojstvu člana Nadzornog odbora u UG „Medica“ Zenica od 26.01.2016. godine, očito nesavjesno postupali u vršenju dužnosti povredom odredbe člana 28. Statuta Udruženja „Medica“ Zenica broj 01-0259-2014 od 07.02.2014. godine, koja propisuje obavezu da se staraju o zakonskom raspolaganju imovine „Medica“, te propustili dužnost nadzora propisanu istim članom prema kojem su dužni kontrolisati finansijsko poslovanje „Medica“ Zenica i prema kojem imaju pravo obaviti pregled rada u svako doba, a najmanje jednom godišnje, svjesni da uslijed takvog propuštanja i neizvršenja svojih dužnosti može nastupiti imovinska šteta po Udruženje, što su i htjeli, na koji način su omogućili direktorici Sabihi Husić da zaključi 97 ugovora o djelu i ugovora o autorskom djelu u ukupnom neto iznosu od 458.448,26 KM, poblize opisanih pod tačkom I) i na taj način bez kontrole finansijskog poslovanja raspolaže imovinom zaključenjem ugovora o djelu i ugovora o autorskom djelu za aktivnosti koje su spadale u redovnu djelatnost Udruženja, uslijed čega je nastupila imovinska šteta Udruženju građana „Medica“ Zenica u iznosu od 458.448,26 KM,

**Dakle**, Husić Sabiha kao odgovorna osoba u Federaciji BiH iskorištavanjem svojih ovlaštenja sebi i drugima pribavila imovinsku korist koja prelazi 50.000,00 KM te drugom nanijela imovinsku štetu, a Alijagić Amira, Šiljak Irma, Čajlaković-Mešanović Fatima i Brandić Hava, kao odgovorne osobe u Federaciji BiH očito nesavjesno postupali u vršenju dužnosti i zbog čega je nastupila imovinska šteta koja prelazi 10.000,00 KM,

**Čime bi** počinile Husić Sabiha pod tačkom I) krivično djelo zloupotreba položaja ili ovlaštenja iz člana 383. stav 3. u vezi sa stavom 1. KZ F BiH, a Alijagić Amira, Šiljak Irma, Čajlaković-Mešanović Fatima i Brandić Hava pod tačkom II) krivično djelo nesavjestan rad u službi iz člana 387. stav 2. u vezi sa stavom 1. KZ F BiH, u vezi sa članom 31. KZ F BiH.

Na osnovu člana 212. stav 4. ZKP F BiH oštećeni se sa imovinsko pravnim zahtjevom upućuje na parnični postupak.

Na osnovu člana 203. stav 1. ZKP F BiH troškovi krivičnog postupka padaju na teret budžetskih sredstava.

**O b r a z l o ž e n j e**

Kantonalno tužilaštvo Zenica je optužnicom T04 0 KTKV 0038529 20 od 22.12.2022. godine, optužilo Husić Sabihu zbog krivično djela Zloupotrebe položaja ili ovlaštenja iz člana 383. stav 3. u vezi sa stavom 1. KZ F BiH, te Alijagić Amiru, Šiljak Irmu, Čajlaković-Mešanović Fatimu i Brandić Havu zbog krivičnog djela Nesavjestan rad u službi iz člana 387. stav 2. u vezi članom 31. KZ F BiH, a kako je to bliže činjenično i pravno navedeno u optužnici.

Optužnica je potvrđena od strane sudije za prethodno saslušanje ovog suda pod brojem: 04 0 K 012220 22 Kps dana 04.01.2023. godine.

Optužene su pred sudijom za prethodno saslušanje dana 08.02.2023. godine porekle krivnju zbog krivičnih djela za koja se terete radi čega je zakazan redovan glavni pretres.

Dana 26.04.2024. godine kantonalni tužilac Imamović Ermin je izjavio da odustaje od krivičnog gonjenja optuženih Husić Sabihe, Alijagić Amire, Šiljak Irme, Čajlaković-Mešanović Fatime, Brandić Have, a prema optužnici broj T04 0 KTKV 0038529 20 od 22.12.2022. godine.

S obzirom da je postupajući tužilac odustao od optužbe ovaj sud je odlučio kao u izreci, te donio odbijajuću presudu, a na osnovu člana 298. tačka b.) ZKP F BiH.

Kako je u ovom predmetu donesena odbijajuća presuda oštećena „Medica“ Zenica se sa imovinsko pravnim zahtjevom upućuje na parnični postupak, dok troškovi krivičnog postupka padaju na teret budžetskih sredstava.

Zapisničar:

Telalović Jela, s.r.

Predsjednik vijeća

Maličbegović Enes, s.r.

**PRAVNA POUKA:**

Protiv ove presude dozvoljena je žalba Vrhovnom sudu FBiH.

Žalba se podnosi putem ovog suda u roku od 15 dana od dana prijema presude.